

George Davelaar a nase na Kòrsou 16 februari 1961

Despues di a kaba skol básiko mi a sigui na LTS (skol di fishi), kaminda mi a siña pa Elektromonteur.

Na aña 1981 mi a drenta Bedrijfschool di Shell. Aki nan mi a studia pa Machinemonteur / Bankwerker. Mi a siña i bira Toolfitter ehersiendo mi trabou.

Na 2020 mi a baha for di Refineria Isla, despues di 39 aña i awe mi ta ku penshun bon meresí. Mi por bisa trahando na Refineria Isla mi a siña masha hopi mes.

Komo mucha di 12 aña mi padrino señor Erwin Campagnard (deft.), eks trahadó di ALM den aviashon, a trese un modelo di un helikòpter pa mi, komo e tabata traha modelo di avion. Mi a haña hopi interes pa mi tambe siña traha modelo di avion.

Eynan mi pashon a kuminsá pa traha modelo. Di aña 1979 te ku aña 1983 mi a forma parti di un klup di “Modelbouw”, kaminda huntu nos tabata sinta papia i tra modelo. Despues mi interes a baha i mi a stop di tra model.

Na aña 1986 mi a kasa ku Suzie Efraci i eynan mi a kuminsa traha model atrobe te ku dia di awe.

Un di mi gran soñonan tabata pa un dia partisipá na un Expo di “Modelbouw” na Oropa.

Na 2016 mi a logra esaki pa prome biaha. E aña ey mi a partisipà ku e diorama di e torpedo ku a subi tera na Eagle beach dia 16 di februari 1942 i un otro diorama mas.

E aña ei (2016) mi no a logra di kai den premio pero si mi a konosè hopi persona di diferente país ku tambe ta traha modelo i ku ta un profeshonal riba e tereno aki. Dor di kontakto ku e trahadonan di modelo profeshonal, buska informashon i lesa diferente tópiko di “modelling”, mi a amplia mi konosementu i desaroyá mi abilidadat riba e arte aki.

Un otro mundu a habri pa mi, i tur e siguiente añanan ku mi a partisipá, mi a logra di bin kas (Kòrsou) ku medaya di oro, plata i brons.

E kompetensia di mas grandi pa mi, ta World Model Expo 2022 kaminda mi a logra medaya di oro den mi klasse.

World Model Expo ta tuma lugá kada 3 aña ku partisipashon di diferente país.

Mi diorama nan a kompetí na Hulanda, Belgiká, Tsjechië i e aña aki tambe na Hungría.

Un amigu di mi, Robert Blokker (Hulanda), ta inskribí i biaha ku e modelonan ora ku mi no ta na Hulanda.

E aña aki (2023), mi ta obligá na partisipá den e “Class master” ku ta e nivel di kompetensia mas haltu ku tin na Oropa.

Durante di mi trayekto di trabou na Refineria Isla, mi a traha diferente obra pa gerensia di Refineria Isla i hefenan ku tabata baha ku penshun. E obra ta un rekuerdo pa e aña ku e persona a traha na Refineria Isla.

Mi a traha varios obra pa diferente instansianan komo un regalo of rekuerdo.

Un di e gran obranan aki ta e orgel ku tin den Synagogo na Punda, na miniatura.